

Amandman I.

U članu 3. Prijedloga zakona o izmjenama i dopunama Zakona o javnim nabavkama ,novi članovi 4a. i 4b. koji se dodaju ovim članom mijenjaju se i glase :

Član 4a.

(Nabavke koje uključuju ugovorne organe sa sjedištem u BiH i ugovorne organe iz država članica Evropske unije)

- (1) Ugovorni organ može zajednički provesti postupak javne nabavke s jednim ili više ugovornih organa iz država članica Evropske unije na način propisan odredbama ovog člana i člana 4b.ovog zakona.
- (2) Ugovorni organ može koristiti usluge obavljanja poslova centralizirane javne nabavke koje pružaju organi za centralizirane javne nabavke iz države članice Evropske unije .
- (3) Pravo države članice Evropske unije u kojoj organ za centralizirane javne nabavke iz stava (2) ovog člana ima sjedište primjenjuje se na obavljanje poslova centraliziranih javnih nabavki ,na dodjelu ugovora na osnovu okvirnog sporazuma koji je zaključio organ za centralizirane javne nabavke i na dodjelu ugovora na osnovu dinamičkog sistema kupovine kojim upravlja organ za centralizirane javne nabavke.
- (4) Ugovorni organi ne mogu da koriste mogućnosti iz st. (1) i (2) ovog člana s ciljem izbjegavanja primjene odredbi ovog zakona ,drugih zakona i propisa u Bosni i Hercegovini .
- (5) Odredbe ovog člana primjenjuju se od dana pristupanja Bosne i Hercegovine Evropskoj uniji .

Član 4b.

(Provođenje postupaka nabavke koji uključuje ugovorne organe iz različitih država članica Evropske unije)

- (1) Ugovorni organ može s jednim ili više ugovornih organa iz država članica Evropske unije zajednički provesti postupak za dodjelu ugovora o javnoj nabavci ,sklopiti okvirni sporazum ,upravljati dinamičkim sistemom kupovine te dodijeliti ugovore na osnovu okvirnog sporazuma ili dinamičkog sistema kupovine .
- (2) Osim ako su neophodni elementi zajedničke nabavke propisani međunarodnim sporazumom sklopljenim između Bosne i Hercegovine i država članica Evropske unije u kojima ugovorni organi imaju sjedište,ugovorni organi koji učestvuju u zajedničkoj nabavci obavezni su da sklope sporazum u kojem utvrđuju :
 - a) odgovornost stranaka i mjerodavno nacionalno pravo Bosne i Hercegovine ili jedne od država članica Evropske unije iz koje ugovorni organi dolaze ;
 - b) unutrašnju organizaciju postupka nabavke , uključujući upravljanje postupkom,raspodjelu robe ,radova ili usluga koje se nabavljaju te sklapanje ugovora.
- (3) Pri utvrđivanju odgovornosti i mjerodavnog nacionalnog prava u skladu sa stavom (2) ovog člana,ugovorni organi koji učestvuju u zajedničkoj nabavci mogu raspodijeliti određene odgovornosti među sobom te utvrditi da će se u postupku primjenjivati odredbe nacionalnog prava bilo koje države iz koje ugovorni organi dolaze .

- (4) U obavještenju o nabavci i tenderskoj dokumentaciji predmetnog postupka navode se raspodjela odgovornosti i mjerodavno nacionalno pravo.
- (5) Odredbe ovog člana primjenjuju se od dana pristupanja Bosne i Hercegovine Evropskoj uniji .

Amandman II.

U članu 7. Prijedloga zakona o izmjenama i dopunama Zakona o javnim nabavkama ,koji se odnosi na član 11. Zakona o javnim nabavkama,stav (6) mijenja se i glasi :

„(6) Ugovorni organ dužan je omogućiti kopiranje kod ugovornog organa ili fotografiranje ponuda ili omogućiti prijenos podataka na medij za pohranu podataka svakom ponuđaču koji podnese pisani zahtjev ,osim podataka koji su označeni povjerljivim, u skladu sa stavom (5) ovog člana .“

U istom članu stav (7) briše se .

Amandman III.

U članu 13.Prijedloga zakona, a koji se odnosi na član 17.stav (8) mijenja se i glasi :

„ (8) Ako postoje opravdani razlozi ,posebno u vezi s predmetom nabavke iz ugovora ,trajanje ugovora može biti duže od jedne godine.“

Amandman IV.

Mijenja se član 17. Prijedloga zakona o izmjenama i dopunama Zakona o javnim nabavkama,kojim se mijenja član 28.Zakona o javnim nabavkama i glasi :

U članu 28.stav (4) mijenja se i glasi :“(4) U slučajevima iz člana 21.tač.a),b) i c) ugovorni organ objavljuje na portalu javnih nabavki informacije o pregovaračkom postupku koji namjerava provoditi bez objave obavještenja o nabavci,tako što će tendersku dokumentaciju učiniti dostupnom svim zainteresiranim kandidatima.“

U članu 28.dodaje se novi stav (5) koji glasi : „(5) U slučajevima iz člana 21.tačka d) ugovorni organ može objaviti na portalu javnih nabavki informacije o pregovaračkom postupku koji namjerava provoditi bez objave obavještenja o nabavci,tako što će tendersku dokumentaciju učiniti dostupnom svim zainteresiranim kandidatima .“

Ostali stavovi pomjeraju se za jedno mjesto naprijed.

Amandman V.

U članu 23. Prijedloga zakona o izmjenama i dopunama Zakona o javnim nabavkama, st.(1) i (2) brišu se .

Amandman VI .

U članu 24. Prijedloga zakona o izmjenama i dopunama Zakona o javnim nabavkama, koji se odnosi na član 44. Zakona o javnim nabavkama, novi stav (7) mijenja se i glasi:

„(7) Provjera kvalifikacije kandidata/ponuđača elektronskim putem uređuje se podzakonskim aktom , koji donosi Vijeće ministara BiH, najkasnije u roku od jedne godine od početka primjene ovog zakona , a nakon sticanja uslova u jednom ili više nadležnih organa u kojima se vode baze podataka koje se odnose na privredne subjekte .“

Amandman VII.

U članu 25. Prijedloga zakona o izmjenama i dopunama Zakona o javnim nabavkama, kojim se mijenja član 45. stav (5) Zakona o javnim nabavkama, broj „36“ zamjenjuje se brojem „12“.

Novi stav (6) mijenja se i glasi :

„Rok od 12 mjeseci računa se od dana donošenja odluke nadležnog organa iz stava (5) ovog člana Zakona“.

Amandman VIII.

Član 28. stav (4) Prijedloga zakona o izmjenama i dopunama Zakona o javnim nabavkama koji se odnosi na član 52. Zakona o javnim nabavkama mijenja se i glasi :

4) Odredba stava (1) ovog člana na odgovarajući način primjenjuje se na srodnike po krvi u pravoj liniji ili u pobočnoj liniji do trećeg stepena , srodnike po tazbini do drugog stepena , bračnog ili vanbračnog druga , bez obzira na to je li brak prestao, te usvojitelje i usvojenike (u daljnjem tekstu : povezane osobe) predstavnika ugovornog organa iz stava (3) ovog člana.

U članu 28. Prijedloga zakona o izmjenama i dopunama Zakona o javnim nabavkama, koji se odnosi na član 52. Zakona , st.(5) i (7) brišu se .

Stavovi od (6) do (14) postaju st. Od (5) do (12).

Amandman IX.

Član.33 Prijedloga zakona o izmjenama i dopunama Zakona o javnim nabavkama, kojim se mijenja odnosno dopunjava član 75. Zakona , mijenja se i glasi :

U članu 75. iza novog stava (4) dodaju se novi st. (5),(6),(7),(8),(9),(10),(11),(12) i (13) koji glase :

„(5) Izuzetno od odredbi člana 72. stav (5) ovog zakona, ugovor o javnoj nabavci može se izmijeniti tokom njegovog trajanja bez provođenja novog postupka javne nabavke ako su kumulativno ispunjeni sljedeći uslovi:

- a) do potrebe za izmjenom došlo je zbog okolnosti koje pažljiv i savjestan ugovorni organ nije mogao predvidjeti ;
 - b) izmjenom se ne mijenja cjelokupna priroda ugovora;
 - c) svako povećanje cijene nije veće od 30% vrijednosti prvobitnog ugovora i ne može imati za cilj izbjegavanje primjene ovog zakona.
- (6) Izmjena ugovora u smislu stava (5) ovog člana nije moguća ako je riječ o povećanju cijena do 5% vrijednosti prvobitnog ugovora robe i usluga, odnosno do 10% vrijednosti prvobitnog ugovora o javnoj nabavci radova.
- (7) Izmjena cijena može se zahtijevati samo za razliku u cijeni koja prelazi 5% odnosno 10%, osim ako je do povećanja cijena došlo poslije dobavljačevog dolaska u docnju.
- (8) Ako je učinjeno nekoliko uzastopnih izmjena ,ograničenje iz stava (5) tačka c) ovog člana procjenjuje se na osnovu neto kumulativne vrijednosti svih uzastopnih izmjena.
- (9) Ugovorni organ obavezan je ,u pogledu izmjene ugovora na osnovu ovog člana ,postupiti u skladu s članom 75.st.(2) i (3) ovog zakona.
- (10) Ako ugovor sadrži odredbu o indeksaciji cijene (odredba o promjenjivosti cijene s objektivno utvrđenim pravilima o promjenjivosti cijene) ,referentna vrijednost za izračun maksimalnog povećanja cijene je ažurirana cijena prvobitnog ugovora u trenutku izmjene.
- (11) U procesu izmjene ugovora ugovorni organ mora osigurati dokaze ,u pisanoj formi ,koji potvrđuju postojanje činjenica i okolnosti iz stava (5) ovog člana , na osnovu kojih je izvršena izmjena ugovora .
- (12) Odredbe st. od (5) do (11) ovog člana na odgovarajući način primjenjuju se i na izmjene okvirnog sporazuma tokom njegovog trajanja .
- (13) Odredbe st. od (5) do (12) ovog člana primjenjuju se na sve ugovore o javnoj nabavci /okvirne sporazume ,čije trajanje i realizacija je u toku,kao i na sve buduće ugovore o javnoj nabavci/okvirne sporazume ,koji će biti zaključeni nakon provedenih postupaka javnih nabavki .“

Amandman X.

Član 34.stav (3) mijenja se i glasi : u stavu (3) na kraju interpunkcijski znak tačka zamjenjuje se interpunkcijskim znakom zarez i dodaju riječi : „pri čemu ni ukupna procijenjena vrijednost istovrsnih nabavki na godišnjem nivou nije veća od 10.000,00.

Amandman XI.

U članu 43. Prijedloga zakona o izmjenama i dopunama Zakona o javnim nabavkama,koji se odnosi na član 100.Zakona,u stavu (2) riječi : „u roku od deset dana“ zamjenjuje se riječima:“u roku od pet dana“.

U stavu (4) u drugoj rečenici riječi : „bez odgađanja,a najkasnije“ brišu se.

Amandman XII.

U članu 49. Prijedloga zakona o izmjenama i dopunama Zakona o javnim nabavkama, koji se odnosi na član 108. Zakona, u stavu (4), iza riječi "člana" dodaju se riječi : „i člana 105.tačka (i) Zakona“.

U stavu (7), iza skraćenice "URŽ" dodaju se riječi : „u roku od sedam dana od dana donošenja odluke povodom žalbe“, a iza riječi "postupka" upisuje se zarez i dodaju riječi : "koja se mora provesti u roku od 30 dana od dana zaprimanja rješenja o povratu naknade za pokretanje žalbenog postupka.“

Amandman XIII.

Član 59. Prijedloga zakona o izmjenama i dopunama Zakona o javnim nabavkama mijenja se i glasi :

„Ovaj zakon stupa na snagu osmog dana od dana objavljivanja u „Službenom glasniku BiH“, a primjenjivat će se protekom tri mjeseca od dana njegovog stupanja na snagu, osim odredbi:

- a) novih čl.4a i 4b. Zakona, koji se dodaju članom 3.ovog zakona, koji se primjenjuju od dana pristupanja Bosne i Hercegovine Evropskoj uniji ;
- b) novih st. (5),(6),(7),(8),(9),(10),(11),(12) i (13), kojim se, u skladu s članom 33. ovog zakona, dopunjava član 75. Zakona, koje se primjenjuju od dana stupanja na snagu ovog zakona .“